

TIR

Dus giadas Annina Tomaschett

Dominada è l'occurrènz vegnida per gronda part da las tiraduras. Gist dus giadas sisum il podest èn stadas Annina Tomaschett ed Enrica Caluori. Ellas han tratg precis e stadas las dominaturas dal campinadi grischun.

GION NUTEGN STGIER/FMR

Bunas relaziuns tar il campinadi chantunal sin la distanza da 50 meters cun l'arma da calibr pitschen a Domat. Ina giada dapli è sa mussà che per la «musica» en quella disciplina da tir segnan las tiraduras. Las participantas han lura er sajettà ferm e per part laschà als concurrents pauc steteg.

In duel Tomaschett cunter Färber

Tar l'elita èsi vegnì tar in vair cumbat tranter Annina Tomaschett (Trun) e Lars Färber (Favugn), ella ed el commembers dal cader naziunal da tir. Tomaschett ha lura er gudagnà la concurrenz en venter e quai cun in resultat da 617.5 puncts. La medaglia d'argent quella è ida a Marcel Caduff (Termin) grazia a ses resultat da 615.9 puncts. Cumplettà il podest ha Färber cun be 0.4 puncts damain che Caduff. Plain tensiun è lura stada la concurrenz da trais posiziuns tar l'elita. Avant il davos culp era anc Färber a la testa cun in avantatg da dus puncts sin Tomaschett. Cun il davos culp ha Färber be fatg in 7.2, dentant che Tomaschett ha sajettà in 10.3. Uschia è la Sursilvana daventada campionesa grischuna, sco gia en il steteg en venter. Terza è vegnida en quel final Anna Laura Klucker (Tumein). Marie-Louise Degonda (Cumpiadals) è vegnida campionesa grischuna tar ils veterans steteg en venter e tar il steteg en venter pusà è il titel i a Johann Ueli Mani (Tumein). Tar las junioras daventa Enrica Caluori (Razén) dubla campionesa grischuna. Plazs da podest hai er dà per Anja Cadalbert (Sevgein), Chiara Weishaupt (Degen) e Chris Wolf (Trun).



Las medaglias han fatg. (da san.) Lars Färber, Annina Tomaschett ed Anna Laura Klucker.

FOTO HUBERT TOMASCHETT



La gronda part da la populaziun fa in test d'antigen.

FOTOS SOMEDIA OLIVIA AEBLI

«Anc adina cumplettamain surdumandà cun testar»

Sa laschar vaccinar u pli gugent far in test da corona? Il mument è ca. 49% da la populaziun da la Svizra e dal Principadi da Liechtenstein vaccinada duas giadas. Ina gronda part da la glied basegna pia anc in test per occurrenz e viadis. La FMR ha discurrì cun la possessura da la «Steinbock Apotheke» Monika Fehr davart la situaziun actuala e dumandà persunas che sa laschan testar sch'ellas fissan prontas da pajar per in test.

LAURA SCHÜTZ/FMR

«Nus essan anc adina cumplettamain surdumandads cun testar», raquinta *Monika Fehr*. Quai era sch'il punct culminant saja vargà ed ins remarugia plaunsieu ina diminuziun da la dumonda. Da la fin zercladur fin mez fanadur hajan surtut famiglias sa laschà testar per ir en vacanzas. Ussa sajan quai autras gruppas fitg maschadadas per tutgant vegliadetgna e schlattaina. Glied pli veglia na dumonda dentant betg pli savens in test, cunquai che blera è gia vaccinada.

Motivs èn multifars

Ils motivs per far in test da corona èn fitg differents. Quai po esser per ir a nozzas, en champs u per sclerir ch'ins na saja betg positiv sch'ins ha gi contact cun ina persuna infectada. «Surtut vers la fin da l'emna testain nus blera glied. Venderdi e sonda è la dumonda mingamai quatter giadas pli gronda che normalmain», di *Monika Fehr*.

La blera glied che dumonda in test na saja betg vaccinada. Mo singuls pajais, sco per exempel l'Engalterra, pretendan anc ch'era glied vaccinada sa lascha testar avant d'entrar en il pajais.

«Sche la populaziun svizra stuess tuttenina pajar senza ils tests dessi franc dapli vaccinaziuns.»

Monika Fehr, apotecra

Lucia Parolini s'ha laschà testar era sch'ella è vaccinada, però betg per ir en l'exteriur. «Igl ha dà cas da corona en il club nua che jau sun stada en sortida, uschia che jau vuleva controllar che jau na saja betg positiva», di ella.

Pajar u vaccinar?

«95% da la glied sa decida per in test d'antigen. In test da PCR è mo necessari en singuls cas, per sumeglia per viagià per intgins pajais», constatescha *Monika Fehr*. Actualmain surprena la Confederaziun ils custs per ils tests d'antigen per burgais e burgaisas svizzers/as ch'èn assicurads/adas qua. Ils tests da PCR vegnan mo pajads sch'ins ha sintoms u sch'ins sa lascha testar sin indicaziun d'in medi u d'ina media u pervia d'in messadi da la «SwissCovid» App. «Sche la populaziun svizra stuess tuttenina pajar senza ils tests dessi franc dapli vaccinaziuns», di *Monika Fehr*. Ella crai dentant era ch'i dessi resistenza. «Jau pajass pli gugent che da ma laschar vaccinar», manegia in um che vul restar anonim. En in tal cas reduciss el sias sortidas. In ulteriur um che sa lascha testar per passentar la fin d'emna en l'Italia di ch'el na fissi betg pront da surpender ils custs. «Jau ma vi però uschè u uschia ma laschar vaccinar bainprest», raquinta el.

Tiraduras giuvnas han sajettà il meglier

A la tiradura Federica Spinas è reussì da repeter ses success da l'onn passà e da gudagnar danovamain l'occurrènz chantunala U21. Madleina Schmid, ella ha tratg il pli ferm tar ils giuvens U15.

GION NUTEGN STGIER/FM

L'elita grischuna dals tiradurs giuvens è sa mesirada al stand da tir Crappa Naira ad Alvagni. Da la partida al final chantunal dal tir da giuvens èn stads 110 mats e matas. Eruids n'èn betg mo vegnids ils campions en il tir singul, mabain er tar las gruppas. 18 gruppas han tratg en la categoria dals giuvens e tschintg gruppas en la categoria U15. Buna disciplina, buns resultats e buna atmosfera, quai è d'attribuir a la generaziun giuvna ch'è sa participada a l'occurrènz.

Persvas en la seria

Tar ils giuvens U21 è gia sco avant in onn a Sent stada sisum il podest Federica Spinas (Vicosoprano). Danovamain ha la matta da 17 onns tratg il pli ferm e gudagnà il tir singul. Fatg ha ella cun 94 puncts in fitg bun resultat ed uschia defendì ses titel gudagnà avant in onn. Da menziunar è che la matta cun ragischs surmiranas deriva d'ina famiglia da fermis tiradurs. En ses temp sajettà ella gugent e bain, però dat el-

la er gugent tennis e suna clavazin. Tratg precis ha Spinas cunzunt en la seria cun far gist quatter dieschs in suenter l'auter. Cun ses segund plaz e grazia a ses 93 puncts ha lura procurà Enea Capaul (Castrisch) per ina vaira surpraisa. Cum-

plettà il podest ha Leandro Jäger (Sur), in dals gronds favorits en la categoria giuvens. Jäger ha sajettà 91 puncts, per el in resultat plitost magher. Gudagnà l'occurrènz da gruppas ha Bregaglia 3, avant Bregaglia 1 e Castrisch.

En la categoria dals giuvens ha Madleina Schmid tratg 86 puncts e gudagnà nunspegià. Schmid ha dasper il sajettar anc in auter hobi e quai è il sport da raiver. Ultra da quai è ella er ina fitg buna skiunza e commembra dal Club da skis Sedrun. Vi-

cecampiun è vegnì Gian Ardüser (Casti) Ardüser ha fatg 84 puncts. Tants puncts ha er sajettà Auryñ Kücher (Tumegl), dentant gi in culp pli bass che Ardüser. La concurrenz da las gruppas ha gudagnà la gruppa da Sedrun-Tujetsch, avant Tumegl e Sent.



Victoria per la gruppa da Sedrun-Tujetsch tar ils giuvens. (da san.) Alicia Beer, Elia Schmed und Madleina Schmid.



Las campionesas Federica Spinas (san.) e Madleina Schmid.

FOTOS GION NUTEGN STGIER